

Pertikaian
DI TAMPIN

Jawatan Undang Luak Tampin disalah beri 18/3/87

SEREMBAN, Selasa — Keturunan Yam Tuan Muda Raja Ali Rembau-Tampin hari ini, meminta Dewan Keadilan dan Undang Negeri Sembilan campur tangan secara langsung dalam usaha menyelesaikan tuntutan mereka mendapatkan semula kuasa, kedaulatan dan kebesaran memerintah sebagai Raja di Luak Tampin.

Sambil menyatakan kesal kerana tuntutan itu setakat ini tidak mendapat perhatian, khususnya dewan dan Kerajaan Negeri Sembilan, mereka mendakwa hak kedaulatan dan kebesaran memerintah sebagai Raja di Luak Tampin disalahberikan kepada keturunan Syed Shaaban pada zaman penjajah dahulu.

Tuntutan itu membatalkan empat beradik le-

laki anak Raja Othman, iaitu Raja Arif, Raja Ahzan, Raja Abdul Hamid dan Raja Mohd Yusof.

Raja Mohd Yusof, yang bertindak sebagai jurucakap mereka, menjelaskan tuntutan itu sudah diperjuangkan oleh keturunan baka Yam Tuan Muda Raja Ali secara rasmi sejak 1946 sehingga sekarang.

Dalam kenyataan kepada *Berita Harian* di sini, beliau berkata, pihaknya beberapa kali mempersembahkan tuntutan itu kepada Yang Dipertuan Besar Negeri Sembilan selaku pengerusi dewan, malangnya tidak mendapat sebarang jawapan.

Menurutnya, kali terakhir pihaknya berbuat demikian ialah pada 24 Mac tahun lalu dengan menggariskan lapan se-

bab mempertikaikan kesahihan kedudukan gelaran Tunku Besar Tampin yang disandang oleh keturunan Syed Abdul Hamid Syed Shaaban.

"Tuntutan ini tidak sepatutnya dianggap mengandungi sentimen perebutan kuasa memerintah, tetapi adalah atas prinsip institusi warisan itu sendiri yang berkehendakkan kepada kesahihan dan kebenaran.

"Kami membuktikan bahawa tuntutan ini adalah satu perkara yang sah dan tidak melanggar undang-undang. Dengan itu ia perlu mendapat perhatian daripada semua pihak, khususnya Dewan Keadilan dan Undang Negeri Sembilan.

"Kami juga sedia menghadapi sebarang tindak balas serta risiko jika tuntutan ini tidak mempunyai asas kebenaran," katanya.

Raja Mohd Yusof berkata, antara lapan sebab utama pihaknya mempertikaikan kesahihan kedudukan gelaran Tunku Besar Tampin yang disandang oleh keturunan Syed Abdul Hamid Syed Shaaban ialah:

Sebab

- Bahawa setiap gelaran diraja yang wujud di Negeri Sembilan amnya dan di Rembau/Tampin khasnya adalah hak kedaulatan warisan atau pesaka asasi bangsa Melayu, iaitu keturunan Raja dan bukannya keturunan Syed yang berasal dari luar kawasan Nusantara;

- Bahawa setiap gelaran diraja yang berkuatkuasa mestilah mempunyai asas yang sah di segi aturan adat, iaitu berasal usulkan Melayu jati selaras dengan Fasal XVI, Undang-Undang Tubuh Kerajaan Negeri Sembilan;

- Gelaran Tunku Besar Tampin yang diberi kepada Syed Abdul Hamid Syed Shaaban adalah ciptaan penjajah Inggeris (Gabenor Sir Frederick Weld) tanpa mengikut aturan adat istiadat dan tradisi bangsa Melayu purba yang bersendikan hukum Islam;

- Bahawa latar belakang Leluhur Tunku Besar Tampin itu adalah petualang dan tali barut penjajah Inggeris untuk memecahbelahkan bangsa Melayu di bumi Rembau/Tampin, Linggi dan Naning yang sudah dirakamkan dalam sejarah negara.

campur tangan tuntutan kami'

24/3/87

SEREMBAN, Isnin — Baka Yam Tuan Muda Raja Ali Rembau-Tampin hari ini menasihatkan pengamal adat di Luak Tampin supaya jangan campur tangan dalam soal tuntutan mereka bagi mendapatkan semula hak kebesaran untuk memerintah sebagai Raja di luak itu.

Sambil menyifatkan kenyataan oleh pengamal adat berkenaan sebagai bercanggah dengan fakta sejarah, mereka berkata tuntutan itu tidak mempunyai sebarang kaitan sama ada secara langsung atau tidak dengan pengamal adat itu.

"Ini adalah urusan antara kami dengan penyandang jawatan Tunku Besar Tampin sekarang, Syed Idrus Syed Mohamad dan dengan itu kami meminta supaya mereka yang menggelar diri sebagai pengamal adat di Luak Tampin jangan campur tangan.

"Semua bukti yang ada di tangan kami adalah sah dan diakui oleh Arkib Negara serta tokoh sejarah negara," kata Raja Mohd Yusof, yang bertindak selaku jurucakap kepada empat adik beradik keturunan baka itu.

Bellau juga mahu pengamal adat berkenaan supaya memperkenalkan diri masing-masing dan tidak sepatutnya mengamalkan sikap 'berselindung di belakang tabir'.

Menurut bellau, pihaknya berpendapat pengamal adat berkenaan tidak berhak mempertikalkan tuntutan itu kerana ia di bawah bidang kuasa Dewan Keadilan dan Undang Negeri, Kerajaan Negeri Sembilan serta pihak lain yang berkaitan.

Bellau menambah pengamal adat berkenaan juga tidak sepatutnya membuat andalan mengenal soal sama ada Perlembagaan Negeri Sembilan patut dipinda jika tuntutan itu menda- pat layanan pihak berkuasa kerana ia di bawah bidang kuasa Kerajaan Negeri sendiri.

padan pada 9 Januari 1833;

● Penyandang gelaran Tunku Besar Tampin sekarang tidak mempunyai kuasa mutlak sebagai seorang Raja kerana bellau tidak pernah ditabalkan sebagai Raja mengikut adat istiadat kebesaran Raja-Raja Melayu.

Bellau menggariskan dua sebab utama penyandang gelaran Tunku Besar Tampin sekarang tidak dapat berfungsi sebagai seorang Raja di Luak Tampin iaitu:

● Pengwujudan gelaran Tunku Besar Tampin ialah ciptaan penjajah Inggeris (Sir Frederick Weld) berdasarkan hak kuasa kedaulatan warisan dan pesaka asasi bangsa Melayu Almarhum Yam Tuan Raja Ali, Datuk Penghulu dan Keadukan kepada perjanjian kemerdekaan Rembau-Tampin pada 20 Januari 1832 dan perjanjian sem-

Syor bentuk suruhanjaya

20/3/87

SEREMBAN, Khamis — Baka Yam Tuan Raja Ali Rembau/Tampin meminta Dewan Keadilan membentuk satu suruhanjaya yang dianggotai oleh wakil kerajaan negeri, ahli-ahli sejarah dan pengamal adat untuk membincangkan semula kesahihan fakta sejarah bagi menentukan siapa yang berhak mewarisi kebesaran diraja di Luak Tampin.

Salah seorang keturunan baka itu, Raja Mohd Yusof Raja Othman, berkata inilah antara jalan penyelesaian yang paling baik untuk menentukan perlembagaan negeri yang ada sekarang benar-benar sahih atau tidak.

"Sebagai baka Yam Tuan Ali, kami masih berpegang kepada fakta sejarah dan bukti-bukti yang ada, iaitu hak berkuasa di Luak Tampin adalah hak baka Yam Tuan Ali, bukannya hak

Syed Shaaban dan keturunannya.

"Syed Shaaban hanya menantu Yam Tuan Ali dan beliau serta keturunannya tidak boleh berkuasa di luak itu seperti yang berlaku sekarang.

"Mengikut adat istiadat raja-raja, kuasa memerintah sebagai raja di luak itu dan negeri-negeri beraja amnya, dikira berdasarkan baka, bukannya saka atau perut," katanya.

Berpunca

Raja Mohd Yusof berkata, kekuasaan yang diperolehi oleh keturunan Syed Shaaban adalah berpunca daripada isterinya, Tengku Lebar, iaitu anak perempuan kepada Yam Tuan Raja Ali.

"Perjanjian Kemerdekaan Rembau/Tampin bertarikh 20 Januari 1832 dan Perjanjian Sempadan 9 Januari 1833, antara Kerajaan Inggeris dengan Yam Tuan Raja Ali, Datuk Penghulu Rembau, Datuk Nganit dan ketua-ketua suku, menunjukkan Yam Tuan Raja Ali dan bakanya

adalah yang berkuasa di Luak Tampin.

"Bagaimanapun perjanjian itu tidak dipatuhi oleh mereka yang menggubal perlembagaan pada tahun 1959. Ini terbukti selepas pihak berkenaan mengenyapkan setiap tuntutan yang dikemukakan oleh baka Yam Tuan Raja Ali sejak tahun 1946.

"Kami juga ada menghantar memorandum kepada suruhanjaya penggubal perlembagaan yang diketuai oleh Lord Reid pada 5 Julai 1956, tetapi tidak berjawab," katanya.

Menurut Raja Mohd Yusof, tuntutan itu juga pernah dibuat ketika Datuk Rais Yatim menjadi Menteri Besar Negeri Sembilan.

"Dalam jawabannya, beliau berkata sepatutnya kami membuat tuntutan itu sebelum perlembagaan itu termaktub pada tahun 1959.

"Tuntutan itu sudah pun kami buat sejak 1946, iaitu 13 tahun lebih awal sebelum perlembagaan itu termaktub pada tahun 1959, tetapi kami halan bagaimana ia tidak sampai ke pengetahuan pihak berwajib," jelasnya.

Raja Mohd Yusof kesal dengan kekeliruan yang berlaku sejak mula tuntutan itu dibuat sehingga sekarang.

Katanya, banyak fakta sejarah dikemukakan oleh pengamal adat untuk mengulas laporan mengenai tuntutan hak berkuasa di Luak Tampin semalam, bergagah.

"Kami bercakap atas dasar fakta sejarah — bukan dibuat secara emosi. Tuntutan itu bukan bertujuan mengandungi sentimen berebut kuasa, tetapi kami menuntut kerana atas prinsip hak," katanya.

Baka Yam Tuan Raja Ali bersedia bersemuka dengan pengamal adat untuk membuktikan kekeliruan yang berlaku, tambah beliau.

'Hentikan tuntutan pesaka Tunku Besar Tampin'

26/3/87

TAMPIN, Rabu — Pengamal-pengamal Adat Perpatih Wilayah Tunku Besar Tampin meminta Raja Mohd Yusof Raja Othman, jurucakap empat beradik keturunan baka Yam Tuan Raja Ali, supaya berhenti daripada membuat kenyataan mengenai tuntutan mereka mendapatkan semula pesaka Tunku Besar Tampin.

"Ini perlu jika keturunan Yam Tuan Raja Ali tidak mahu orang lain campur tangan termasuk pengamal adat. Hendaknya mereka membuat tuntutan secara senyap-senyap bukannya diheboh-hebohkan khususnya melalui akhbar," kata seorang jurucakap pengamal adat.

Raja Mohd Yusof dalam kenyataannya yang disiarkan oleh *Berita Harian* kelmarin menasihatkan pengamal adat Luak Tampin supaya jangan campur tangan dalam soal tuntutan mereka bagi mendapatkan semula hak kebesaran untuk memerintah sebagai Raja di Luak Tampin.

Raja Mohd Yusof mendakwa kenyataan pengamal-pengamal adat itu bercanggah dengan fakta sejarah yang ada di dalam simpanannya serta pendapat tokoh-tokoh sejarah negara.

"Adat Perpatih adalah hak semua orang Melayu di Negeri Sembilan terutama mereka yang menjadi anak Waris kepada 12 Suku yang ada dan bukannya kepunyaan Raja Mohd Yusof dan adik-beradiknya sahaja.

"Adalah menjadi kewajiban setiap pengamal adat di negeri ini bersuara apabila berlaku sebarang kekecohan atau tuntutan yang dianggap menyalahi aturan Adat Perpatih dan fakta sejarah," tambah jurucakap itu.

Mengenal bukti yang ada di tangan Raja Mohd Yusof, yang didakwanya sebagai diakui oleh Arkib Negara dan tokoh-tokoh sejarah negara, beliau berkata "catatan sejarah

yang tersimpan di Arkib Negara tidak bermakna isi kandungannya benar dan boleh dijadikan bukti".

Ia dikumpul dan disimpan oleh Arkib Negara untuk dijadikan bahan rujukan dan kajian, bukan sebagai bukti kesahihan fakta-fakta yang tercatat, katanya.

Dewan Keadilan tidak akan layan tuntutan baka Yam Tuan Raja Ali

SEREMBAN, Selasa — Dewan Keadilan dan Undang Negeri Sembilan tidak akan melayan tuntutan keturunan baka Yam Tuan Raja Ali Rembau-Tampin untuk mendapatkan semula hak kedaulatan bagi memerintah sebagai Raja di Luak Tampin.

Mesyuarat dewan Khamis lalu memutuskan bahawa soal tuntutan itu sudah 'selesai' dan dengan itu sebarang surat mengenainya yang dikemukakan oleh keturunan berkenaan kepada dewan tidak akan dilayan.

Satu sumber tertinggi adat berkata dewan berpendapat isu itu tidak wajar ditimbulkan oleh keturunan berkenaan kerana ia bercanggah dengan Perlembagaan Negeri Sembilan.

Tuntutan itu mem-babitkan empat adik-beradik lelaki keturunan Raja Othman. Jurucakap mereka, Raja Mohd Yusof mendakwa bahawa hak mereka untuk memerintah sebagai Raja di Luak Tampin disalahberikan kepada keturunan Syed Shaaban semasa zaman penjajahan dahu-

Keputusan

"Mesyuarat dewan Khamis lalu menyifatkan soal hak kedaulatan dan kuasa memerintah di Luak Tampin yang diberikan kepada keturunan Syed Shaaban sebagai muktamad serta tidak boleh dlungkit lagi.

Menurut sumber itu, keputusan yang dibuat oleh dewan Khamis lalu adalah muktamad dan ia tidak boleh dipertikaikan oleh mana-mana pihak termasuk keturunan berkenaan.

Sementara itu, Raja Mohd Yusof ketika dihubungi berkata pihaknya akan terus memperjuangkan tuntutan berkenaan kerana 'kami sanggup menanggung segala risikonya'.

"Kami mempunyai segala bukti sah untuk mempertikaikan bahawa gelaran Tun-ku Besar Tampin yang diberikan kepada keturunan Syed Shaaban adalah berasaskan kepada hak kedaulatan serta pesaka asasi keturunan Al-marhum Yam Tuan Raja Ali."

Baka Yam Tuan Raja Ali enggan terima keputusan

1987
SEREMBAN, Isnin — Keturunan Baka Yam Tuan Raja Ali Rembau-Tampin tidak dapat menerima keputusan Dewan Keadilan dan Undang Negeri Sembilan mengenai isu tuntutan mereka serta menganggapnya sebagai keputusan yang mengelirukan.

Jurucakap mereka, Raja Mohd Yusof Raja Othman, berkata pihak-

nya tidak pernah menuntut gelaran atau pesaka Tunku Besar Tampin seperti yang digambarkan oleh kenyataan dewan mengenai perkara itu.

Dewan dalam kenyataannya Jumaat lalu menolak tuntutan itu sambil menegaskan ia tidak timbul lagi dan sudah lama selesai.

"Kami tidak sekali-kali menuntut gelaran

Tunku Besar Tampin apatah lagi pesakanya. Dengan itu, penjawatan dewan khususnya menyentuh Fasal 14 (2) Undang-Undang Tubuh Kerajaan Negeri Sembilan 1959 tidak timbul sama sekali dalam membincangkan soal tuntutan kami ini.

"Yang kami menuntut ialah hak kedaulatan warisan atau pesaka asasi Almarhum Yam Tuan Raja Ali, yang berasaskan perjanjian bertarikh 20 Januari 1832 dan 9 Januari 1833. Hak ini sudah disalah beri kepada keturunan Syed Shaaban oleh pihak Inggeris dahulu.

"Kewujudan gelaran Tunku Besar Tampin adalah ciptaan penjajah Inggeris, Gabenor Sir Frederick Weld dengan berasaskan hak warisan keturunan kami dan ini adalah pencabulan," katanya Raja Mohd Yusof dalam kenyataan kepada Berita Harian di sini, hari ini.

Menurut beliau, pihaknya mempunyai bukti sah bahawa hak memerintah sebagai Raja di Luak Tampin adalah hak keturunan mereka dan bukannya hak keturunan Syed Shaaban.

Beliau juga mengulang dakwaan bahawa Syed Shaaban pernah dipenjarakan selama enam bulan di Melaka oleh pihak Inggeris.

Raja Mohd Yusof berkata, pihaknya akan terus membuat tuntutan mengikut saluran tertentu kerana "maruah kami telah dicabul".

"Dengan itu dewan hendaklah menerima hakikat bahawa tuntutan kami ini adalah satu perkara yang perlu diberi perhatian wajar dan seterusnya membuat satu keputusan yang adil dan saksama.

"Sesungguhnya, kami tidak mahu wujud sebarang ketegangan di antara keturunan kami dengan keturunan Syed Abdul Hamid Syed Shaaban dalam usaha untuk mempertahankan maruah kami," katanya.

Anak waris 13.8.87

Melekai kembali ke suku asal bertentangan Adat Perpatih

JOHOL, Rabu — Pengamal-pengamal adat perpatih di Luak Johol menganggap tindakan sekumpulan anak waris suku biduanda Melekai dekat sini, mengisytiharkan keluar daripada suku itu dan kembali ke suku asal mereka sebagai bertentangan dengan aturan Adat Perpatih luak itu.

"Seseorang yang hendak keluar daripada suku mereka dan memasuki suku lain atau balik ke suku asalnya bukanlah sebegitu mudah.

"Langkah yang diambil oleh ketua kumpulan waris Encik Aziz Panglima Puteh Seman pengisytiharan diri dan 12 kerabatnya keluar suku melalui akhbar sama seperti yang dilakukan oleh ahli persatuan dan pertubuhan," kata pengamal adat itu.

Encik Aziz dalam kenyataannya semalam mengumumkan beliau bersama 12 kerabatnya keluar daripada suku itu (Bidunda Petai) dan kembali ke suku asalnya keturunan raja mengikut keturunan Lenggang dan Raja Bendahara Sekudal.

Keputusan itu diambil kerana keengganan Datuk Undang Luak Johol, Datuk Haji Abdul Rahman Md Som menerima beliau dan rombongannya mengadap bagi membincangkan tuntutan pusaka Datuk Muda Johol sebagai bakal undang.

Mendapat kebulatan

Menurut pengamal adat, seseorang boleh keluar daripada suku mereka dan memasuki suku lain dengan syarat kemasukannya itu mendapat kebulatan daripada semua anak buah suku yang menerimanya dengan beberapa syarat lagi termasuk berkadim dan mececah darah.

"Yang lebih mengelirukan lagi ialah kerabat itu tidak menyebut suku asal mereka. Dalam adat perpatih di Negeri Sembilan dan Naning ada 12 suku.

"Suku-suku itu ialah Suku Biduanda, Batu Hampar, Seri Melenggang, Tanah Datar, Mungkal, Seri Lemak, Tiga Batu, Tiga Nenek, Paya Kumbuh, Anak Melaka, Anak Aceh dan Suku Batu Belang," katanya.

Jika permohonan dan pengisytiharan kumpulan kerabat Encik Aziz itu diterima ia juga akan boleh mendatangkan kesusahan kepada waris-waris perempuannya.

Kerana mengikut aturan Adat Perpatih, apabila keluar daripada suku maka tanah pusaka yang dimiliki adalah terlepas daripada hak milik mereka.

Mengenai jawatan Datuk Muda Johol sebagai bakal undang di masa lampau tidak slapa yang boleh menaikkannya.

"Tetapi jawatan itu telah dihapuskan pada tahun 1901 atas beberapa sebab tertentu dan penyanggah bakal undang digantikan dengan Datuk Baginda Tan Mas.

"Semenjak dari tarikh itu hinggalah sekarang ini bakal undang Luak Johol adalah bergelar Datuk Baginda Tan Mas dan ia sudah diwartakan dalam perlembagaan Negeri Sembilan," kata pengamal adat itu.

Aziz dan kerabat kembali ke suku asal

11.8.87

SEREMBAN, Isnin — Waris suku biduanda Kampung Melekat, Johol, Negeri Sembilan Aziz Datuk Panglima Puteh Saman bersama 11 kerabatnya hari ini mengumumkan keluar dari suku itu dan kembali kepada suku asalnya keturunan raja mengikut keturunan Lenggang dan Raja Bendahara Sekudai.

Keputusan itu diambil kerana keengganan Datuk Undang Luak Johol Datuk Abdul Rahmar Md Som menerima beliau dan rombongannya mengadap bagi membincangkan tuntutan pusaka Datuk Muda Johol sebagai bakal undang.

Beliau yang datang ke pejabat *Berita Harian* di sini berkata, tuntutan itu dibuat pada 30 April 1985. Dalam surat tuntutan berkenaan, Encik Aziz meminta jawatan Datuk Muda Johol dihidupkan kembali.

Bagaimanapun, Datuk Undang Luak Johol dalam suratnya bertarik 1 Mei 1985, enggan menerima tuntutan itu dan menegaskan bahawa Datuk Muda Johol sudah lama dihapuskan.

"Dengan penolakan itu bermakna orang yang memegang jawatan Datuk Baginda Tan Mas adalah calon yang layak dilantik menjadi Datuk Undang Luak Johol menurut salasilah sekarang," katanya.

Encik Aziz berkata kalau dikaji salasilah asal, mereka yang berhak menjadi Datuk Undang Luak Johol mestilah dari keturunan Lenggang dan Raja Bendahara Sekudai dan mestilah memegang jawatan Datuk Muda Johol.

"Jawatan Datuk Muda Johol sudah dilenyapkan ketika pemerintahan Datuk Undang Luak Johol, Datuk Eto 1991. Jawatan itu akhir sekali dipegang oleh Datuk Pilih yang dibunuh sehari sebelum dilantik menjadi Undang," jelas beliau.

Encik Aziz berkata, selepas Datuk Eto meninggal beliau telah diganti oleh Wan Omar yang berasal dari Gemencheh.

"Sejak tarikh itu jawatan Datuk Undang Luak Johol tidak lagi disandang oleh Datuk Muda Johol tetapi telah diambil alih oleh Datuk Baginda Tan Mas daripada suku Wan Omar," tambah beliau.

Ramlah ikat jamin anaknya hingga 17 Mac ini

JOHOL, Selasa — Empat adik beradik, duanya bersaudara kembar yang ditahan polis pada Sabtu lalu kerana menghalang istiadat kerjan Undang Luak Johol ke-12, Datuk Johan Pahlawan Lela Perkasa Setiawan, Datuk Haji Abdul Rahman Mohd Som, dibebaskan tengah hari ini.

Mereka dibebaskan setelah masing-masing dikenakan ikat jamin \$1,000 oleh oleh ibunya, Puan Ramlah Abdul Samad, 49.

Jaminan itu adalah untuk tempoh sehingga 17 Mac ini, kata seorang jurucakap polis di sini.

Dua saudara kembar, Lokman dan Hakim bersenjatakan keris dan Hamdan ditahan polis selepas mereka menghalang rombongan Datuk Undang yang hendak menyempurnakan istiadat kerjan (tabal) di perigi Gadang dan Makam Gobah Bukit Istana 10 Kilo-meter dari sini.

Manakala adiknya Wahid ditahan kerana menghalang pihak polis menjalankan tugas. Tindakan empat beradik itu menyebabkan istiadat kerjan tertangguh empat jam.

Jawatan Datuk Baginda Tan Mas mungkin mansuh

4/4/87

SEREMBAN, Jumaat — Jawatan Datuk Baginda Tan Mas (bakal Undang) di Luak Johol mungkin dimansuhkan bagi melicinkan lagi urusan pentadbiran Adat Perpatih di luak itu.

Berita Harian difahamkan anak-anak Waris Perut Johol di luak itu bercadang menyembahkan satu memorandum kepada Yang Dipertuan Besar Negeri Sembilan selaku Pengerusi Dewan Keadilan dan Undang Negeri tidak lama lagi.

"Ini bertujuan mengurangkan perbalahan di kalangan anak-anak Waris Perut Johol dan Perut Gemencheh terutama apabila berlaku kekosongan jawatan Datuk Baginda Tan Mas iaitu bakal penyandang pesaka Undang Luak Johol.

"Bagaimanapun, matlamat sebenarnya dipercayai untuk menentukan pembahagian kuasa di kalangan anak-anak Waris kedua-dua Perut itu bagi menetapkan pesaka Undang hanya berhak disandang oleh anak-anak Waris Perut Johol.

"Anak-anak Waris Perut Gemencheh pula hanya berhak menyandang pesaka Datuk Baginda Tan Mas," kata satu sumber tertinggi adat Luak Johol hari ini.

Jika cadangan ini diterima oleh Dewan Keadilan dan Undang Negeri, anak-anak Waris Perut Johol akan mengesyorkan jawatan Datuk Baginda Tan Mas dimansuhkan dan anak-anak Waris Perut Gemencheh diberi kuasa mentadbir Luak Kecil Gemencheh.

Mentadbir

Sumber itu berkata soal penentuan jawatan baru bagi pentadbir adat di luak kecil berkenaan hendaklah ditentukan oleh Dewan Keadilan dan Undang Negeri.

Mengikut aturan adat Luak Johol, jawatan Undang luak itu hendaklah digilirkan di kalangan anak-anak Waris daripada Perut Johol dan Gemencheh. Lazimnya jika jawatan Undang disandang oleh anak Waris Perut Johol, maka jawatan

Datuk Baginda Tan Mas (bakal Undang) akan disandang oleh anak Waris daripada Perut Gemencheh dan begitulah juga sebaliknya.

Jawatan Undang ke-12 Luak Johol kini disandang oleh Datuk Johan Pahlawan Lela Perkasa Setlawan Haji Abdul Rahman Mohd Som daripada Perut Gemencheh. Jawatan Datuk Baginda Tan Mas pula disandang oleh Datuk Abdul Ali daripada Perut Johol.

Sumber itu juga berkata anak-anak Waris Perut Johol yang dianggarakan berjumlah 500 orang dijangka mengadakan satu kerapatan adat tidak lama lagi bagi membincangkan perkara itu secara terperinci sebelum mengemukakan memorandum mereka kepada dewan.

Bagaimanapun, sumber itu berkata memorandum berkenaan pasti ditentang oleh anak-anak Waris Perut Gemencheh kerana cadangan itu mungkin dianggap satu "percubaan untuk menafikan hak mereka daripada menyandang pesaka undang luak".

Kehilangan keris punca kekecohan

JOHOL, Isnin — Dua bilah keris pesaka yang menjadi salah satu alat kebesaran Undang Luak Johol yang hilang 147 tahun lalu, dikatakan menjadi punca kekecohan adat dan perlantikan Undang Luak Johol.

Keris pesaka itu dikatakan hilang pada tahun 1840, selepas kematian Undang keenam, Datuk Abu Bakar Gobah (Tok Buncit), demikian kata seorang Datuk Lembaga, Datuk Menteri Zabudah Janan.

Menurutnya, apabila seseorang Undang meninggal dunia, segala alat kebesaran termasuk dua bilah keris itu, hendaklah diserahkan kepada penggantinya.

Tetapi setelah Datuk Abu Bakar meninggal dunia, keris itu tidak diserahkan kepada Undang ketujuh, Datuk Seato (Eto) oleh keluarga isteri Datuk Abu Bakar dari Suku Biduanda Raja Balang. Keris itu kemudian dikatakan hilang.

Beberapa Undang dan Datuk Lembaga yang terkemudian mencari dua keris itu tetapi tidak berhasil sehingga hari ini.

"Mungkin keris pesaka itu disembunyikan oleh balu Allahyarham Datuk Abu Bakar dan menjadi hakmilik Suku Biduanda Raja Balang Rumah Gadang, Bukit Istana, iaitu keluarga Puan Ramlah Abdul Samad, 49.

"Kerana dua keris itu ialah keluarga Puan Ramlah mendakwa kononnya berhak menyandang jawatan Undang Luak Johol dan mengaku berasal dari keturunan Puteri Setiawan, Undang Luak Johol pertama.

"Dua keris itu digunakan oleh anak kembar Puan Ramlah, Lokman dan Hakim menghalang Undang Luak Johol ke-12, Datuk Haji Abdul Rahman menjalani istiadat kerjan (tabal) dan bersiram di perigi Gadang dan menaikkan daulat di makam Gobah, Kampung Bukit Istana dekat sini Sabtu lalu," katanya.

Bellau menambah, jika keris yang digunakan oleh dua beradik itu, yang kini disimpan polis sebagai barang kes dalam peristiwa mengamuk Sabtu lalu, benar-benar keris pesaka yang hilang itu, maka Datuk-Datuk Lembaga akan menuntutnya apabila kes itu selesai.

"Ketladaan dua keris itu tidak menghalang istiadat kerjan Datuk Undang dan tidak mencatitkan sesiapa juga yang menyandang pesaka Datuk Undang Luak Johol," katanya.

Dewan Keadilan tolak permohonan Baka Yam Tuan Raja Ali

29.8.87

SEREMBAN, Jumaat — Dewan Keadilan dan Undang Negeri Sembilan menolak permohonan Keturunan Baka Yam Tuan Raja Ali Rembau-Tampin untuk mendapatkan hak kebesaran bagi memerintah sebagai Raja di Luak Tampin.

Setiausaha dewan, Haji Abdul Hamid Lasim, berkata hari ini keputusan itu dibuat di dalam mesyuarat dewan pada 23 Julai lalu, yang dipengerusikan oleh Yang Dipertuan Besar Negeri Sembilan selaku pengerusi dewan.

"Dewan, yang sudah bermesyuarat pada 23

Julai, 1987 di Istana Besar, Seri Menanti memutuskan bahawa isu ini tidak timbul lagi dan telah selesai," katanya dalam satu kenyataan di sini.

Bellau berkata, dewan memutuskan bahawa kedudukan Tunku Syed Idrus Tunku Syed Mohammad selaku Tunku Besar Tampin adalah jelas mengikut Fasal 14 (2) Undang-Undang Tubuh Kerajaan Negeri Sembilan 1959, yang berbunyi:

"Pesaka Tunku Besar Tampin hendaklah turun-temurun daripada putera yang sulung di antara putera-putera yang di dalam nikah ke-

turunan Tengku Syed Abdul Hamid bin Tengku Syed Shaaban daripada sebelah pihak lelaki.

"Tetapi jika ganti Tunku Besar itu masih berumur bawah daripada 18 tahun mengikut tahun masihi, maka pesaka itu hendaklah digantung dahulu sehingga ganti Tunku Besar itu berumur 18 tahun.

"Dengan termaktubnya Perlembagaan Undang-Undang Tubuh Kerajaan Negeri Sembilan 1959, khasnya Fasal 14 (2) di atas, pesaka Tunku Besar Tampin itu adalah dipastikan daripada keturunan Tengku Syed Abdul Hamid bin Tengku Syed Shaaban."

Keturunan Baka berkenaan mengemukakan tuntutan mereka yang berasaskan kepada perjanjian bertarikh 20 Januari 1832.

Jurucakap mereka, Raja Mohd Yusof Raja Othman di dalam tuntutan itu mendakwa bahawa hak kebesaran mereka untuk memerintah sebagai Raja di Luak Tampin sudah "disalah berikan" kepada keturunan Syed Shaaban semasa penjajahan Inggeris dahulu.

Menurut beliau, pihaknya sudah mengemukakan tuntutan itu secara rasmi sejak tahun 1946, tanpa mendapat layanan sewajarnya daripada pihak berkuasa khususnya dewan sendiri.

Keturunan baka Yam Tuan Raja Ali

beri penjelasan

15/4/87

SEREMBAN, Selasa — Keturunan baka Yam Tuan Raja Ali Rembau-Tampin menjelaskan mereka tidak berniat memenangkapi sebarang pihak dalam usaha mendapatkan semula hak mereka bagi memerintah sebagai Raja di Luak Tampin.

Sambil melahirkan rasa kesal terhadap salah-tanggapan pengamal-pengamal adat di luak itu, juru-cakap mereka, Raja Mohd Yusof Raja Othman mengulangi tuntutan mereka adalah 'bertepatan dengan adat yang bersendirikan hukum (syarak).

Menurutnya, persoalan pokok yang ditimbulkan oleh pihaknya adalah berhubung usaha untuk mendapatkan semula hak warisan atau pesaka

asasi mereka bagi memerintah sebagai Raja di Luak Tampin yang telah disalahberikan kepada keturunan Syed Abdul Hamid Syed Shaaban oleh penjajah Inggeris.

Cucu

"Berdasarkan adat yang bersendirikan hukum (syarak) dan hukum bersendirikan Kitabullah (al-Quran), yang berhak mewarisi pesaka Diraja Almarhum Yam Tuan Raja Ali ialah keturunan baka (lelaki) dan bukannya saka (perempuan).

"Persoalan pokoknya sekarang ialah kenapa hak untuk me-

merintah di Luak Tampin disandang oleh keturunan Syed Shaaban, sedangkan Syed Abdul Hamid adalah cucu daripada anak perempuan Almarhum Yam Tuan Raja Ali," jelas Raja Mohd Yusof.

Bellau juga mempertikaikan gelaran Diraja 'Tunku' di pangkal nama Syed Abdul Hamid, yang menurutnya diambil sempena nama gelaran ibunya (Syed Abdul Hamid) iaitu Tunku Lebar.

Bellau mendakwa penyelewengan dilakukan oleh golongan tertentu yang ingin menjaga kepentingan sendiri sehingga hak untuk memerintah di Luak Tampin

terlepas ke tangan orang lain.

Tanpa menamakan golongan berkenaan, bellau berkata pihaknya dijadikan mangsa 'sehingga menyebabkan kami kehilangan hak untuk memerintah sebagai Raja di Luak Tampin'.

Jujur

"Hasrat kami untuk berdialog dengan pengamal-pengamal adat berkenaan adalah jujur dan ikhlas. Kami tidak sama sekali berhajat untuk memerangkap mereka dalam usaha mendapatkan semula hak kami bagi memerintah sebagai Raja di Luak Tampin.

"Sebaliknya, kami menganggap keengganan mereka untuk bersempua dengan kami sebagai tidak berani menghadapi kebenaran kerana ia mungkin boleh menggugat kepentingan peribadi mereka," tambahna.

Pengamal Adat tolak cabaran berdialog 11/4/87

TAMPIN, Jumaat — Pengamal-pengamal Adat Perpatih, Wilayah Tunku Besar Tampin hari ini menolak cabaran keturunan baka Yam Tuan Raja Ali Rembau-Tampin berdialog bagi menjelaskan kedudukan sebenar tuntutan mereka mendapatkan semula hak memerintah sebagai Raja di luak itu.

Seorang pengamal adat tempatan berkata cabaran itu ditolak kerana beberapa sebab tertentu.

Pertama, pihaknya tidak mahu terperangkap atau diperangkap serta dijadikan alat oleh keturunan baka Yam Tuan Raja Ali dalam usaha mereka mendapatkan semula hak itu.

"Hal adat sepatutnya diselesaikan mengikut aturan adat yang diadatkan seperti kata perbandingan adat 'Berjinjang naik bertangga turun, ke bukit, mengikut

alur, ke lurah menuju benar, berlopak-lopak bak sawah, beruang-ruang bak durian.'

"Segala masalah adat patut disampaikan atau diadakan kepada ketua-ketua adat dan bukannya dilaporkan kepada polis seperti yang telah dilakukan oleh Raja Mohd Yusof pada 23 Mac lalu," kata pengamal adat itu.

Kedua, perkataan dialog tidak ada dalam kamus Adat Perpatih. Sebarang masalah adat yang timbul mestilah diselesaikan melalui kerapatan adat.

"Ia hendaklah diadakan di rumah telapak adat atau di balai adat dan bukannya di tempat-tempat terbuka seperti di balai raya, surau atau masjid dan kerapatan itu mestilah dihadiri oleh kedua pihak terbabit iaitu pihak yang menuntut dan yang kena tuntutan serta dihadiri oleh ketua-ketua adat.

"Dialog antara keturunan baka

Yam Tuan Raja Ali dengan pengamal adat Perpatih di Wilayah Tunku Besar Tampin hanya sia-sia sahaja kerana ia tidak akan dapat menyelesaikan isu tuntutan mereka kerana keputusan dialog itu tidak boleh dibawa ke mana-mana," jelasnya.

Bellau berkata keturunan baka Yam Tuan Raja Ali hendaklah memahami benar-benar maksud kata-kata adat 'Adat bersendikan hukum, Hukum bersendikan Kitabullah.'

Dalam undang-undang Negeri iaitu Perlembagaan Negeri Sembilan tercatat pesaka Tunku Besar Tampin hendaklah diwarisi oleh anak lelaki keturunan Syed Hamid.

"Dengan itu adalah sia-sia sahaja bagi kita rakyat negeri ini hendak mencabar kesahihan Perlembagaan Negeri," jelas pengamal adat itu.

Keturunan Yam Tuan Raja Ali masih 2.5.57. tunggu...

SEREMBAN, Jumaat — Keturunan baka Yam Tuan Raja Ali Rembau-Tampin kesal kerana Dewan Keadilan dan Undang Negeri Sembilan sehingga ini masih belum mengeluarkan sebarang kenyataan rasmi berhubung isu tuntutan mereka baru-baru ini.

Keturunan itu menuntut untuk mendapatkan semula hak kedaulatan dan kebesaran bagi memerintah sebagai Raja di Luak Tampin, yang mereka dakwa disalahberikan kepada keturunan Syed Shaaban semasa zaman penjajahan dahulu.

Jurucakap mereka, Raja Mohd Yusof Raja Othman, berkata pihaknya meminta dewan segera mengeluarkan kenyataan rasmi mengenai tuntutan mereka, yang telah dibuat secara rasmi sejak tahun 1946.

Beliau mengulangi bahawa tuntutan pihaknya tidak bercanggah dengan sebarang undang-undang yang berkuatkuasa di negara ini termasuk Perlembagaan Persekutuan dan Perlembagaan Negeri Sembilan serta Rukunegara.

"Antara lain Rukunegara menjamin kedaulatan undang-undang yang bertujuan mewujudkan keadilan di kalangan masyarakat kita. Tetapi nampaknya kami sekarang seolah-olah tidak diberi peluang langsung untuk menuntut keadilan.

"Persoalan yang ingin kami timbulkan di sini ialah bahawa kenapa hak kebesaran untuk memerintah di Luak Tampin diserahkan kepada keturunan Syed Shaaban sedangkan mereka tidak terbabit langsung dalam sebarang perjanjian yang ditandatangani di antara keturunan kami dengan pihak Belanda dan Inggeris dahulu.

Pengamal Adat Perpatih di Luak Tampin diajak dialog^{10/4/87}

SEREMBAN, Khamis — Keturunan baka Yam Tuan Raja Ali Rembau-Tampin, hari ini, mencabar pengamal-pengamal Adat Perpatih di Luak Tampin supaya berdialog dengan mereka bagi menjelaskan kedudukan sebenar berhubung tuntutan mereka mendapatkan semula hak memerintah sebagai Raja di luak itu.

Jurucakap mereka, Raja Mohd Yusof Raja Othman berkata pihaknya menyedari hak pengamal-pengamal adat di luak berkenaan untuk mengemukakan pandangan mereka mengenai tuntutan itu.

"Kami sedar bahawa setiap pengamal adat berhak menyatakan pandangan serta pendiriannya mengenai urusan perjalanan sistem Adat Perpatih di negeri ini.

"Tetapi malangnya, pengamal-pengamal adat di Luak Tampin telah menyalah-tafsirkan tuntutan kami dengan mengemukakan fakta serta keterangan yang sama sekali bercanggah dengan bukti-bukti yang ada di dalam simpanan kami.

Yakin

"Pada masa yang sama, pengamal-pengamal adat itu juga tidak mahu memperkenalkan siapa diri mereka sebenarnya dan inilah yang mendorong kami membuat aduan kepada polis baru-baru ini," jelasnya dalam kenyataan kepada Berita Harian di sini.

Bellau yakin sebarang salah faham yang mungkin timbul akan dapat diselesaikan demi menjaga kepentingan Adat Perpatih menerusi dialog itu nanti.

Mengenai aduan polis itu, Raja Mohd Yusof berkata ia bertujuan mengelakkan dari kemungkinan timbulnya sebarang kejadian yang tidak diingini memablitkan kedua belah pihak nanti.

Dalam tuntutan mereka, empat adik-beradik itu meminta supaya dikembalikan semula kepada mereka hak kedaulatan dan kebesaran untuk memerintah sebagai Raja di Luak Tampin, yang mereka dakwa telah disalahberikan kepada keturunan Syed Shaa-ban pada zaman penjajah dahulu.

Krisis adat: Aduan dibuat kepada polis

31.387

Oleh BUSTAMAM AHMAD

SEREMBAN, Isnin — Baka Yam Tuan Raja Ali Rembau-Tamplin membuat aduan polis terhadap kenyataan pengamal-pengamal adat di Luak Tamplin.

Jurucakap mereka, Raja Mohd Yusof Raja Othman, berkata beliau sendiri membuat aduan itu di Ibu Pejabat Kontinjen Polis Negeri di sini, pada 23 Mac lalu.

Beliau menggariskan dua sebab utama mereka berbuat demikian, iaitu:

- Kenyataan pengamal-pengamal adat berkenaan dianggap sebagai satu 'ancaman' kepada pihaknya.

- Pengamal-pengamal adat itu tidak boleh dipertanggungjawabkan terhadap sebarang kenyataan yang mereka buat kerana mereka tidak memperkenankan slapa diri mereka sebenarnya.

Raja Mohd Yusof sekali lagi mengulangi kesediaannya berdialog dengan pengamal-pengamal adat di Luak Tamplin bagi menjelaskan kedudukan sebenar berhubung soal tuntutan mereka untuk mendapatkan semula hak kebesaran memerintah sebagai Raja di luak itu.

Beliau berharap dapat mengemukakan bukti-bukti sahih bagi mengesahkan

rap ia dapat dipengerusikan oleh Pegawai Daerah Tampin," katanya dalam kenyataan kepada *Berita Harian* di sini.

Serentak itu, beliau mengulangi bahawa bukti-bukti yang dianggap sahih oleh pihaknya bukannya catatan sejarah semata-mata, tetapi adalah di dalam bentuk surat-surat asal pelbagai perjanjian.

Antaranya termasuk surat perjanjian kemerdekaan Rembau bertarikh 20 Januari 1832 dan perjanjian smpadan Tampin/Rembau-Melaka bertarikh 9 Januari 1833, tambahhya.

Raja Mohd Yusof berkata, pihaknya tidak menafikan hak pengamal-pengamal adat berkenaan membuat ulasan mengenai perjalanan adat kerana kewujudan Yam Tuan Raja Ali adalah di atas restu Adat Perpatih sendiri.

Menurutnya, asas itu jugalah yang mendorong pihaknya membuat tuntutan supaya hak, kuasa dan kedaulatan untuk memerintah sebagai Raja di Luak Tamplin dikembalikan kepada

Pengamal adat bantah tuntutan empat beradik

23/3/87

TAMPIN, Ahad — Pengamal-pengamal Adat Perpatih di Wilayah Tunku Besar Tampin hari ini meminta Dewan Keadilan dan Undang serta Kerajaan Negeri supaya jangan melayan tuntutan empat adik-beradik keturunan Yam Tuan Raja Ali untuk mendapatkan semula hak pesaka jawatan Tunku Besar Tampin.

Mereka berkata empat adik-beradik itu tidak memahami aturan adat, fakta sejarah serta Perlembagaan Negeri yang digunakan sekarang.

Menurut mereka, tuntutan Raja Arif, Raja Ahzan, Raja Abdul Hamid dan Raja Mohd Yusof sengaja dibuat untuk menimbulkan kekecohan adat di negeri ini.

Raja Mohd Yusof dalam kenyataannya yang disiarkan oleh *Berita Harian* semalam meminta Dewan Keadilan membentuk suruhanjaya dlanggotai oleh wakil-wakil kerajaan, ahli-ahli sejarah dan pengamal-pengamal adat untuk membincangkan semula kesahihan fakta sejarah bagi menentukan siapa yang berhak mewarisi kebesaran diraja di Luak Tampin.

Bellau berpendapat ini adalah antara jalan penyelesaian yang paling baik untuk menentukan sama ada perlembagaan negeri ini benar-benar

sahli.

Jurucakap pengamal-pengamal Adat Perpatih di sini berkata: "Perlembagaan Negara dan Negeri Sembilan digubal oleh Suruhanjaya Reid. Perlembagaan itu dipakai sehingga sekarang tanpa sebarang keraguan.

"Jika ada akta di dalam perlembagaan itu yang hendak diubah atau ditambah, maka adalah menjadi tanggungjawab Kerajaan Negeri untuk membawa usul pindaan itu ke dalam persidangan Dewan Undangan Negeri.

Gubal

Menurutnya, sesuatu pindaan itu hendaklah diluluskan oleh sekurang-kurangnya $\frac{2}{3}$ ahli Dewan Negeri dan kemudian mendapat restu Dewan Keadilan dan Undang Negeri sebelum ia boleh diwartakan dan digunakan.

"Mengetahui fakta sejarah yang dinyatakan oleh Raja Mohd Yusof iaitu perjanjian kemerdekaan Rembau-Tampin bertarikh 20 Januari 1832 dan perjanjian sempoan pada 9 Januari 1833 antara Kerajaan Inggeris dengan Yam Tuan Ali dan Undang Luak Rembau, Datuk Nganit, bukanlah perjanjian kemerdekaan Rembau," jelasnya.

Jurucakap itu menambah kedua-dua perjanjian yang dibuat antara Raja Ali dan Syed Shaaban dengan pihak Inggeris di Melaka pada ketika itu adalah perjanjian persahabatan antara kedua-dua belah pihak.

"Hasil daripada perjanjian itu, Raja Ali merasakan dirinya telah menjadi begitu kuat lalu mengisytiharkan dirinya sebagai Yam Tuan Besar Negeri Sembilan dan menantunya, Syed Shaaban sebagai Yam Tuan Muda Rembau.

"Tetapi perisytiharan Raja Ali sebagai Yam Tuan Besar Negeri Sembilan tidak diiktiraf oleh Datuk-Datuk Undang dan akhirnya bellau dihalau oleh Undang Rembau. Bellau kemudian melarikan diri ke Lukut manakala menantunya, Syed Shaaban lari ke Tampin dan menjadi Tunku Besar Tampin.

"Dari fakta sejarah itu siapa yang hendak dipersoalkan, kerana gelaran Yam Tuan Muda kepada Syed Shaaban diberi oleh bapa mertuanya (Raja Ali). Jawatan itu dipesakai oleh keturunan Syed Shaaban hinggalah ke hari ini dengan mendapat pengiktirafan Kerajaan Inggeris ketika itu sehinggalah tercatat dalam Perlembagaan Negeri Sembilan sekarang," ujarnya.

19/3/87

Tuntutan empat beradik langgar adat

TAMPIN, Rabu — Pengamal-pengamal Adat Perpatih Wilayah Tunku Besar Tampin hari ini menganggap tuntutan empat adik-beradik anak Raja Othman iaitu Raja Arif, Raja Ahzan, Raja Abdul Hamid dan Raja Mohd Yusof untuk mendapatkan semula pesaka Tunku Besar Tampin, sebagai terkeluar daripada aturan adat dan Perlembagaan Negeri Sembilan.

Menurut mereka, sudah tercatat dalam Perlembagaan Negeri sekarang bahawa jawatan pesaka Tunku Besar Tampin diwarisi oleh keturunan Syed Hamid.

Raja Mohd Yusof, selaku jurucakap kepada empat beradik itu dalam kenyataannya yang disiarkan oleh *Berita Harian* hari ini meminta Dewan Keadilan dan Undang Negeri campur tangan bagi menyelesaikan tuntutan mereka mendapatkan semula kuasa kedaulatan dan kebesaran memerintah sebagai Raja di Luak Tampin.

Empat adik-beradik itu mendakwa bahawa mereka adalah daripada keturunan Yam Tuan Muda Raja Ali Rembau-Tampin.

Jurucakap pengamal-pengamal adat itu menjelaskan keturunan Yam Tuan Muda Raja Ali tidak berhak menyandang jawatan pesaka Tunku Besar Tampin.

Mengikut sejarah, Raja Ali mengisytiharkan dirinya menjadi Yam Tuan Muda Rembau pada 1815 setelah Raja Hasil melarikan diri ke Melaka kerana tewas dalam satu pergaduhan dengan Undang Luak Rembau ketika itu, Datuk Bongkok.

"Apabila Perang Naning pada tahun 1831-1932 tamat, Raja Ali yang menganggap kedudukan serta kekuasaannya telah begitu kuat selepas beliau dan pengikutnya membantu pihak Inggeris memerangi Naning, maka beliau telah menggelarkan dirinya Yam

Tuan Besar Negeri Sembilan.

"Tetapi kedudukan Raja Ali sebagai Yam Tuan Besar Negeri Sembilan tidak diakui oleh mana-mana Undang di negeri ini," kata jurucakap itu.

Beliau menambah pada 1834, Raja Ali dihalau keluar oleh Undang Luak Rembau, Datuk Nganit.

Raja Ali kemudian melarikan diri ke Lukut manakala menantunya, Syed Shaaban lari ke Tampin dan menjadi Tunku Besar Tampin.

Menurutnya, apabila Syed Shaaban mati pada tahun 1850, jawatan Tunku Besar Tampin digantikan oleh anaknya, Syed Abdul Hamid.

"Sejak dari itulah jawatan pesaka Tunku Besar Tampin disandang oleh keturunan Syed Abdul Hamid seperti mana yang termaktub dalam Perlembagaan Negeri Sembilan sekarang ini.

"Dengan itu jelaslah keturunan Yam Tuan Muda Raja Ali tidak berhak menyandang jawatan Tunku Besar Tampin kerana keturunan mereka telah terkeluar dari aturan adat dan Perlembagaan Negeri," kata jurucakap itu.

Menurutnya, jika empat adik-beradik itu benar-benar mahu menuntut jawatan pesaka Tunku Besar Tampin, mereka hendaklah berusaha untuk meminda Perlembagaan Negeri.

Dengan kedudukan itu, jelasnya jawatan Tunku Besar Tampin yang sekarang ini disandang oleh Tunku Syed Idrus Syed Mohamad tidak boleh dicabar atau digugat baik di segi sejarah ataupun Perlembagaan Negeri.

Sementara itu, Tunku Besar Tampin ketika dihubungi untuk mendapatkan ulasan enggan mengulas sekadar berkata: "Tidak ada apa-apa yang hendak diulas kerana kedudukan itu jelas, seperti yang terkandung dalam Perlembagaan Negeri Sembilan."